



**Siunnersuut: Meeqqanut inuusuttunullu ikiorsiisarneq pillugu Inatsisartut inatsisaat nr xx, xx 2014-imeersoq.
(Ilaqutariinnermut Inatsisinillu Atuutsitsinnermut Naalakkersuisoq)
(Siullermeernera)**

Demokraatini siunnersuutip siunertai tapersersorluinnarpagut. Iluarisimaarparput inatsisip meeqqat pisinnaatitaaffii nukittorsarniarmagit aamma erseqqissarneqarpoq siunnersuummi pingaarnerpaamik tunngaviusoq, ataatsimut tamakkiisumik sullissinnermi meeqqamut ajunnginnerpaaq aallaaviussasoq.

Inatsit annerusumik isigalugu nammineq akornguteqanngilaq kisianni soorunami Demokraatini kissaatigaarput ataasiakkaat allanngortinneqassasut.

Siullermik Meeqqat Oqaaseqartartuat isumaqatigaarput oqarmat § 44 allanngortittariaqartoq, inatsimmi meeqqap pisariaqartitai isigineqartariaqarmata. Taamaattumik siunnersuutigissavarput siunnersuut allanngortinneqassasoq, meeqqap angajoqqaarsiaminiititaasarnera ukiunut marlunnut apparlugu meeraq angajoqqaarsiaminut qanittuaqqamik attuumassuteqalersimappat.

Aappassaatut isumaqarpugut, siunnersuutip § 66-ani allassimassasoq, angajoqqaarsiat meeqqamik immikkut pisariaqartitalimmik tiguisut soorlu innarluutilimmik, pisinnaatitaaffeqassasut pisussaaffeqassasullu pikkorissarnissaminut, meeqqap immikkut pisariaqartitai pikkorissarfigalugit.

Pingajussaanik isumaqarpugut kusanarpallaanngitsoq Naalakkersuisut akuleruffiginiarmassuk ulloq unnuarlu angerlarsimaffinni namineq pigisunik siulersuisuni kikkut inuttaasassanersut. Tassani Naalakkersuisut susassaqaanngillat.

Naggataatigut Demokraatini erseqqissaassutigissuarput inatsisissatut siunnersuut kommunit aningaasartuuteqarnerulernerannik kinguneqartussaammat tassungalu atatillugu Naalakkersuisut apererusuppagut eqqarsarnersut kommuninut tapiissutit isumaqatigiinniutigineranni kommunit aningaasartuuteqarnerusimanerat matuniarlugu imaluunniit aningaasartuutit amerleriaataat kommunit namminneq ersussaneraat?

Taamatut oqaaseqarluta siunnersuut Ilaqutariinnermut Peqqissutsimullu Ataatsimiititalimaut innersuupparput.